

# Ilinniarnertuunngorniarluni ilinniakkami naliliisarneq aamma uppersaasiisarneq pillugit Namminersorlutik Oqartussat nalunaarutaat

Ilinniarnertuunngorniartarneq pillugu Inatsisartut inatsisaanni nr. 13, 22. november 2011-meersumi § 40, imm. 5, § 42, imm. 4, § 44, imm. 3, § 45, imm. 2, § 46, imm. 2-mi oqaaseqatigiit aappaat, § 46, imm. 3, oqaaseqatigiit aappaat, § 50, § 51, imm. 5 aamma § 53, imm. 2 naapertorlugit aalajangersarneqarput:

## Kapitali 1

### *Ingerlaavartumik naliliisarneq*

#### *Nalilerneqartoq, tunngaviusut siunertallu*

§ 1. Ilinniartitsinerup ilinniartunit ataasiakkaanit qanoq pissarsiffigineqarnera pillugu ingerlaavartumik naliliisoqartassaaq.

*Imm. 2.* Ilinniartitaanerup ingerlanerani tamarmiusumi naliliisoqartassaaq.

*Imm. 3.* Naliliinerni ilinniagaqartup nammineq imminut nalilernerani ilaatinneqartassaaq.

*Imm. 4.* Fagini ataasiakkaani ilinniartitsisup nalilersuinissaq akisussaaffigaa.

§ 2. Naliliinermi ilaassapput ilinniartup angusai aammalu ilinniartitaanermigut piginnaanerilersimasai allat.

*Imm. 2.* Ilinniartup angusaanik naliliinermi fagimi ilinniarneqartussatut siunnerfigineqartunut sanilliullugit uuttuisoqartassaaq.

*Imm. 3.* Ilinniartitaanermi ilinniartup pissarsiaasa nalilerneqarneranni ilinniarneqartussatut ineriartorfusussatullu ilinniagaqartup ilinniartitsisuni peqatigalugit anguniagassatut siunnerfiliussimasaanut sanilliussilluni nalilersuisoqartassaaq.

§ 3. Naliliinerup ilinniartoq paasissutississavaa nammineq ilinniakkamigut siuariartorneranut tunngatillugu, taamaaliornikkullu siunnersorneqarnissamut tunngavissanik ilinniartullu ingerlaqqilluni ilinniagaqarnissaanut ineriartornissaanullu tunngavissiilluni, tassuunalu ilinniarnertup sammivissaanut tunngasumik aalajangiinissaanut fagillu sorliit taakkualu qaffasissusissaannut paasissutississavaa. Tamatuma saniatigut naliliinerup isumannaassavaa,

1) ilinniagaqartup fagit qaffasissusaasigut qanoq inissisimanini ilisimassagaa, nammineq ilinniarnerninik ingerlatsinissaminut ineriartornissaminullu tunuliaqutassatut,

2) ilinniartoq misilitsittarnernut sungiusarneqassasoq, namminerlu ineriartornerminik ilinniarnerninillu

naliliisinnaanermut sungiusassasoq,

3) fagini ataasiakkaani ilinniartitsisuusup ilinniarnertuunngorniarluni ilinniarfimmi tamakkiisumik ilinniagaqartut ataasiakkaat klassillu tamarmiusup atuartitaanerminni ineriartornerat pissarsiaallu malinnaaffigisinnaassagai,

4) fagini ataasiakkaani ilinniartitsisuusup ilinniarnertuunngorniarlunilu ilinniarfimmi ataatsimut ilinniagaqartut atuartitaanerminnut tunngatillugu qanoq pissarsiaqartarnerminnik naliliinerat, tassunga ilanngullugu ilinniagaqartut atuartitaanerminnik naliliinerat ataatsimut ilisimasaqarfigissagaa,

5) fagini ataasiakkaani ilinniartitsisuusup ilinniarnertuunngorniarlunilu ilinniarfiup ataatsimut siunnersuinissaminut pilersaarusiornissaminullu tunngavissinneqarnissaa, ilinniagaqartup ilinniarnermi ingerlaqqinnissaanut ineriartoqqinnissaanullu, ilinniakkat sammivissaat eqqarsaatigalugit, faginik qinigaqarnissani taakkualu qaffasissusissaanni, aamma ilinniartitaanerup aaqqissuunneqarneranut siunnersorneqarnikkut, tassunga ilanngullugit immikkut aaqqissuussanik ingerlatsisoqarsinnaanera, aamma

6) angajoqqaatut oqartussaassuseqartunut ilisimatitsissuteqarnissamut ilinniarnertuunngorniarluni ilinniarfiup ilinniartup ilinniarnermi pissarsiarisai pillugit tunngavissai.

*Imm. 2.* Kiisalu naliliineq rektorip ilinniartup klassimut qaffasinnerusumut ingerlaqqissinnaaneranut naammattunik pissarsiaqarsimanersoq tunngavissiissaaq, maannamut atuartitaanermi pissarsiarisimasai ataatsimut eqqarsaatigalugit, tak. § 12.

#### *Naliliisarnerup aaqqissuunneqarnera*

**§ 4.** Rektorip isumannaartassavaa klassinut tamanut nalilersuisarnermut pilersaarummik suliaqartoqartarnissaa, imaattunik imaqartumik:

- 1) Atuaqatigiit klassip iluani misilitsittarnerannut takussutissiaq.
- 2) Fagini tamani qaqugukkut angusanut tunngatillugu karakteriliisoqartarnersoq pillugu takussutissiaq.
- 3) Ilinniartunut tamanut ingerlaavartumik aaqqissuussamillu qanoq angusaqarsimaneq pillugu fagini tamani ilisimatitsissuteqartarnissamut pilersaarut, tamatumunnga ilanngullugu oqaaseqaateqarnerni.
- 4) Nalilersuisarnerit ilinniartunik siunnersuinermit atorineqarnissaannut pilersaarutit.
- 5) Angajoqqaatut oqartussaassuseqartut ilinniartup nalilersuiffigineqarnerani inernerusut pillugit ilisimatinneqarnissaannut pilersaarutit ilinniartunut tamanut atuuttut.
- 6) Ilinniartut atuartitsinermik nalilersuinissaannut pilersaarut.

**§ 5.** Rektorip qulakkiissavaa ingerlaavartumik nalilersuisarnerit piffissami tamatumunnga naapertuuttumi ilinniartitsisut suliamut attuumassuteqartut akornanni oqaluserineqartarnissaat, ilinniartitaanernullu pilersaarutit pisariaqartitsineq naapertorlugu iluarsiivigineqartarnissaat, aammalu pisariaqartitsineq naapertorlugu ilinniartut immikkut perorsaataasumik suliaqarnissamut imaluunniit immikkut aaqqissuussanik ingerlatsisoqarnissaanik neqeroorfigineqartarnissaat.

**§ 6.** Semesterini tamani minnerpaamik angusanut tunngatillugu karakteriliinermik 1-mik oqaaseqaammillu 1-mik fagini ilinniartitsiffiusuni tamani tunniussisoqartassaaq ilinniarnermi periaatsit ilanngunnagit, taamaattoq imm. 4 aamma 5 tak.

*Imm. 2.* Fagini ukiup ilinniarfiusup naanerani naammassineqanngitsuni tamani aamma angusanut

tunngatillugu karakteriliisoqartassaaq, ukiup ilinniartusup pineqartup naanerani.

*Imm. 3.* Angusanut tunngatillugu karakterit aamma oqaaseqaatit immikkut perorsaataasunik suliaqartoqarnissaanik aallartitsinissap imaluunniit immikkut aaqqissuussanik ingerlatsisoqarnissaata aalajangiiffiqeqarnissaanni tunngavigineqartussanut ilaatinneqassapput.

*Imm. 4.* Ilinniartut allami soraarummeeruteqarsimaneq tunngavigalugu fagimi aalajangersimasumi atuartitaanerup ilaani annertuumi peqataannginnissamut akuerisaasut fagimi angusanut tunngatillugu karakteriliisoqassanngilaq oqaaseqaammillu tunniussisoqarani, ilinniartup fagitigut ilisimasaanut tunngasumik naammattumik ilisimasassanik peqanngitsutut naliliisoqarpat.

*Imm. 5.* Ilinniartoq takkuttarnissamut pisussaaffik naammassisimanngippagu angusanut tunngatillugu karakteriliisoqassanngilaq oqaaseqaammilluunniit tunniussisoqarani.

**§ 7.** Ilinniarnertuunngorniarfup nammeneq misilitsinnerit ingerlatassami qanoq ittuunissaat annertussusissaat qaqugukkullu ingerlanneqarnissaat aalajangissavaa, ilinniartut tamarmik ataasiakkaarlutik misilitsinnissat tamaasa sioqqullugu naammaginatsumik annertussusilimmik misilitsinnissamut sungiusarnissaminut periarfissaqarsinnaanngorlugit.

*Imm. 2.* Misilitsinnerni tamani ilinniarnertuunngorniarfup iluani misilitsinnermut karakteriliisoqartassaaq oqaaseqaateqarlunilu.

*Imm. 3.* Ilinniarnertuunngorniarfimmisilitsinnerit inerneris angusanut tunngatillugu karakteriliinissanut tunngaviusussanut ilaatinneqassapput aammalu misilitsinnerni angusat pillugit ilinniartut tamarmik ilisimatinneqartassallutik.

**§ 8.** Ilinniarnertuunngorniarfup ilinniartup semesterini tamani ilinniarnertuunngorniarfup iluani ilaatigut misilitsinnermit karakterii, angusanut tunngatillugu karakterii aamma inaarutaasumik angusanut tunngatillugu karakterii uppersaasertassavaa, tak. § 6. Karakterit allassimaffiat ilinniartumit pissarsiarineqarsinnaassaaq, tassunga ilanngullugu periarfissaqarpat elektroniskiusumik aallersinnaaneq.

*Imm. 2.* Agguaqatigiissitsineq angusanut tamanut tunngatillugu karakterit akunnaalliliinertaqanngitsumik ukiumi ilinniartusumi tunniunneqartut ilinniartup klassimut tullermut ingerlaqqinnissaanut tunngavigineqartassapput, tak. § 11, imm. 3.

#### *Angajoqqaatut oqartussaassuseqartut ilisimatinneqartarnerat*

**§ 9.** Angajoqqaatut oqartussaassuseqartut akuttoqatigiissaakkamik ilinniarnertuunngorniarfup ilinniartup atuarnermi pissarsiaanut tunngatillugu naliliinernik ilisimatinneqartassapput.

*Imm. 2.* Ilisimatitsineq minnerpaamik semesterimi ataatsimi ataasiarluni pisassaaq.

*Imm. 3.* Ilisimatitsineq ilinniartup angusanut tunngatillugu karakterii aammalu misilitsinnerni karakterii, kiisalu ilinniartup atuarnermi tamakkiisumik pissarsiai pillugit oqaloqateqarnissamut neqerooruteqarnikkut pisassaaq.

**§ 10.** Ilinniartunut angajoqqaatut oqartussaassuseqartunit oqartussaaffiqeqanngitsunut angerlarsimaffimmut ilisimatitsineq ilinniartup akuersereerneratigut aatsaat ingerlanneqarsinnaavoq.

**§ 11.** Ilinniartup klassimut qaffasinnerusumut tullermut ingerlaqqinnissaanut piumasaqaataavoq ilinniartup atuartsinermi naammattumik pissarsiaqarsimanissaa.

*Imm. 2.* Ukiup ilinniarfusup naanerani rektorip ilinniartut angusaannut atuartitaanerminnilu pissarsiarisimasaannut tunngatillugit ataasiakkaarlugit naliliiffigisassavai.

*Imm. 3.* Ilinniartop klassimut tullermut ingerlaqqinnissamut pisinnaatitaavoq, ilinniartop ukiup ilinniarfusup naanerani angusisimanissamut piumasaqaammik naammassinnissimaguni, tak. § 96, imm. 4. Ilinniartup angusisimanissamut piumasaqaatinik naammassinnissimanerata naatsorsorneqarnerani – taamaattoqarsimappat, inaarutaasumik angusanut tunngatillugu karakterit ilanngunneqassappat, tak. § 8, imm. 2.

*Imm. 4.* Ilinniartop angusisimanissamut piumasaqaatinik naammassinnissimasoq, kisiannili misilitsissimanissamut piumasaqaatinik tamanik il.il. naammassinnissimanngitsoq, ilinniarnertuunngorniartup ilinniarnermut ileqqorissaarnissamullu malittarisassai naapertorlugit misilitsinnissamut innersuunneqarsinnaanermik annaasaqarsimasoq, klassimut tullermut ingerlaqqinnissaminut pisinnaatitaavoq, rektori ilinniartup ilinniarfimmit anisinneqarnissaanik aalajangersimanngippat.

**§ 12.** Rektorip ilinniartup klassemut qaffasinnerusumut ingerlaqqinnissaa itigartitsissutigisinnaavaa, ilinniartop ataatsimut isigalugu ilinniartitsinermi ingerlanneqareersumik naammaginatsumik pissarsisimanngitsoq nalilernerqarpat, taamaattoq tak. § 11, imm. 3. Rektorip tamatumunnga ilanngullugu nalilissavaa, ilinniartop ilinniarnernik naammassinninniassalluni periarfissaqarnersoq, immikkut aaqqissuussanik ingerlatsisoqarneratigut imaluunniit perorsaanikkut immikkut ikorsiissutaasunik aaqqissuussisoqarneratigut, tamatumunnga ilanngullugu immikkut aaqqissuussamik siunnersuinikkut iliuuseqarnerit.

*Imm. 2.* Pisariaqarpoq, kisiannili tunngavilersuutitut kisiimiissinnaanani, ilinniartup klassimut qaffasinnerusumut ingerlaqqissinnaaneranut angusanut tunngatillugu karakterii semesterimi pineqartumi, piffissamiluunniit killiffiusumi angusisimanermit appasinnerunerat.

**§ 13.** Ilinniartop klassimut tullermut ingerlaqqinnissamut itigartinneqarsimappat, ilinniarnertuunngorniartup anisinneqassaaq, taamaattoq tak. imm. 2.

*Imm. 2.* Ilinniartop ingerlaqqinnissamut itigartinneqarsimasoq, rektorip akuersineratigut klassimik atuarfigisimasaminik uteqqiinissaminut akuerineqarsinnaavoq, taamaattoq kingusinnerpaamik ilinniartop ilinniarnernik aallartitsinerminniit ukiut tallimat qaangiutnnginneranni uteqqiisinnaalluni.

*Imm. 3.* Ilinniarnertuunngorniartup ilinniartup ilinniarnertuunngorniartup anisinneqarneranut atatillugu ilinniartop tassungalu angajoqqaatut oqartussaassuseqartut ilinniartup ilinniarnernik ingerlatsiinnarsinnaaneranut periarfissamik naleqquttumik siunnersussavai, tamatumunnga ilanngullugu ilinniakkamut allamut nuunnissamut periarfissanik imaluunniit ilinniagaqarnissamut inuussutissarsiuteqalernissamulluunniit siunnersuinermit.

## **Kapitali 2**

### *Inaarutaasumik naliliineq*

**§ 14.** Inaarutaasumik naliliineq ataatsimoortumik misilitsinnertut (ilinniarnertuunut soraarummeernertut) ingerlanneqassaaq, taamaattoq tak. § 15, oqaluttariarsorluni misilitsinnertigut, allattariarsorluni misilitsinnertigut kiisalu ilinniakkami ukiumi soraarummeerfusumi ilinniagaqartut ataasiakkaarlutik ilinniarnerminni suliaqarnerisigut. Allattariarsorluni misilitsinneq allattariarsorluni suliatut, suliniuteqarnikkut misilitsinnertut imaluunniit casetut ingerlanneqarsinnaavoq.

*Imm. 2.* Inaarutaasumik naliliinermi ilanngunneqassaaq fagini inaarutaasumik naliliineq, matumani ilinniarnertuunngorniarfik inaarutaasumik angusanut tunngatillugu karakterinik fagini tamani tunniussaqaassalluni. Tamanna semesterimi siullermi timersornermi, ilinniarnerminni suliaqarnerini, ilinniarnermi periutsini aammalu ajornanngippat casemi atuutinngilaq.

**§ 15.** Ilinniarnertuutut soraarummeertoqarsinnaavoq ilinniartitsissutini ataasiakkaani ilinniartitsissutini ilinniakkap sammiviani aalajangersimasumi pinngitsoorani peqataaffigisassani misilitsinnermi, ilinniartitsissutini toqqagassani pisariaqartunik amerlassusilinni aamma ilinniartut ataasiakkaarlutik ilinniarnerminni suliaanni karakterinik katiterinikkut.

*Imm. 2.* Misilitsinnermi karakterit fagini ataasiakkaani uppersaatinik karakterinik taarserneqarsinnaapput, tak. § 96.

*Imm. 3.* Imm. 1 naapertorlugu ilinniarnertuutut soraarummeernermi angusinerup kingorna ilinniagaqartup ilinniarnertuutut misilitsissimanermut uppersaat tigussavaa.

**§ 16.** § 14, imm. 1-imi soraarummeernerit pineqartut nammeneq ilinniartunit misilitsiffigineqarsinnaapput, tak. § 43.

**§ 17.** Ilinniarnertuutut soraarummeernermit ilaasinaapput ilinniartitsissutini tamani misilitsinnerit, taamaallaat ilinniartitsissutit timersorneq, nipilersorneq, assilissanik eqqumiitsuliorneq aamma science qaffasissuseq C-miittut pinnagit, kiisalu ilinniarnermi periutsinik ilinniartitsissut pinnagit. Misilitsinnerit ilinniartitsissutit arlariinngorlugit ingerlanneqarsinnaapput.

*Imm. 2.* Ilinniarnertuutut soraarummeernermi ilaapput fagit pinngitsoorani misilitsiffigineqartussat, tak. § 40, imm. 1 nr. 8.

*Imm. 3.* Ilasutitut fagini, pinngitsoorani misilitsiffigineqartussat imm. 2-mi eqqaaneqartut saniatigut misilitsittoqassaaq, tamannalu ilinniartitaanermut Naalakkersuisoqarfimmit soraarummeerfissatut makitsissutigineqartut tunngavigalugit aalajangerneqassaaq, tak. § 39.

**§ 18.** Inaarutaasumik naliliinerup siunertaraa karakteritigut uppersaasissallugu ilinniartup ilinniartitaanermi fagini assigiinngitsuni ilinniarneqartussatut siunnerfusunik qanoq annertutigisumik angusaqarsimanera.

*Imm. 2.* Inaarutaasumik naliliineq ilinniarnertuutut misilitsissimanermut uppersaammik tunniussinissamat tunngaviuvoq.

§ 19. Soraarummeerneq piffissami immikkut soraarummeernissamut immikkoortitami ingerlanneqartassaaq.

*Imm. 2.* Soraarummeernerit nalinginnaasut maajimi-juunimi ingerlanneqartassapput (aasaanerani soraarummeerneq). Napparsimasunik soraarummeersitsineq aggustimi-septembarimi ingerlanneqartassaaq. Ilinniartitaanermut Naalakkersuisoqarfik pineqartut saniatigut ukiup ingerlanerani piffissani allani soraarummeertoqarnissanut qinnuteqartoqarnerata kingorna akuersisinnaavoq.

*Imm. 3.* Misilitsinnerit aaqqissuunneqarlutillu ingerlanneqartassapput kapitali 4-mi tamatumunnga tunngasumik aalajangersakkat naapertorlugit.

### Kapitali 3

#### *Misilitsittarnermi periaatsit*

##### *Misilitsittarnermi periaatsinik toqqaasarneq ataatsimullu piareersaasiortarneq*

§ 20. Naliliineq ingerlanneqartassaaq oqaluttariarsorluni misilitsinnertigut, allattariarsorluni misilitsinnertigut, ilinniarnermi suliaqarnikkut, ajornanngippat suliaqarluni misilitsinnikkut aammalu ajornanngippat pisimasuutitaliornikkut.

§ 21. Misilitsinnerit aaqqissuunneqassapput ataatsimut isigalugu ilinniartitaanerup siunertaanut naapertuuttumik ilinniartullu ataasiakkaarlutik nalilersorneqarnissaannik isumannaarisumik.

§ 22. Ilinniarnertuunngorniartfik ilikkagassatut pilersaarutaasunut maleruagassat naapertorlugit misilitseriaatsit assigiinngitsut akornanni toqqaasinnaappat, toqqaaneq ilinniartumut atugassarititaasut, pissutsit atuuttut, aammalu soraarummeerneq ataatsimut isigalugu misilitseriaatsit nikerartut atorneqarnerisigut ingerlanneqassaaq.

#### *Allattariarsorluni misilitsinneq*

§ 23. Allattariarsorluni misilitsinneq tassaassaaq Ilinniartitaanermut Naalakkersuisoqarfiup suliassat ataatsimoortut suliarisimasai imaluunniit suliaritissimasai, ilinniartup allattariarsorluni akissasai. Suliassiissutitut ataatsimoortunut siunnersuutit suliassanut kommissionimut Ilinniartitaanermut Naalakkersuisoqarfimmit pilersinneqarsimasumit suliarineqarsinnaapput.

*Imm. 2.* Suliassiissutit ilinniartumit akineqassapput ilikkagassatut pilersaarutaasunut piffissaliussap iluani. Allattariarsorluni misilitsinneq aallartissaaq suliassiissut tunniunneqarpat.

*Imm. 3.* Ilikkagassatut pilersaarummi allatut allassimasoqanngippat misilitsinnermi ikiorsiissutit tamarmik akuerisaassapput.

*Imm. 4.* Soraarummeertut, ilikkagassatut pilersaarummi imaluunniit misilitsinnerit ataasiakkaat pissusiinit allatut allassimasoqanngippat, misilitsinnermi ikiuussinnaanatililu ikiorserneqarnermik tigusaqarsinnaanngillat, tamatumunnga ilanngullugu elektroniskiusumik allatulluunniit avatangiisiminnut attaveqarnikkut.

*Imm. 5.* Ilinniartitaanermut Naalakkersuisoqarfiup qarasaasiakkut akuerisaatigut suliassat

akineqassapput.

*Imm. 6.* Rektorip isumannaassavaa akissutit utertinneqartut tamakkiisumik nalunaarsorneqarnissaat.

#### *Oqaluttariarsorluni misilitsinnerit*

**§ 24.** Oqaluttariarsorluni misilitsinnertut paasineqassapput ilinniarnertuunngorniarfiup suliakkiissutai, ilinniartumut suliakkiissutit ilinniartumit oqaluinnarluni akissat.

*Imm. 2.* Ilikkagassanut pilersaarummi allatut allassimasoqanngippat suliaassat nalinginnaasumik atuaqatigiinnut ilinniartitsisumit suliarineqarsimassapput.

*Imm. 3.* Ilikkagassanut pilersaarummi allatut allassimasoqanngippat suliakkiissutissat oqaasertaat ilanngussanik bilageqarlutik imaluunniit bilageqaratik ilinniartunit ilisimaneqariissanngillat.

*Imm. 4.* Suliakkiissutissat qanoq imaqarnissaannut aqqissuunneqarnissaannullu tunngasut ilikkagassanut pilersaarummi ersissapput.

**§ 25.** Misilitsinnissami suliakkiissutissat fagimi ilikkagassat eqqarsaatigalugit sammiviit tamakkersimaniartussaavaat.

**§ 26.** Misilitsittoqarnissaa sioqqullugu piffissaagallartillugu aammalu kingusinnerpaamik sapaatip akunnera sioqqullugu ilinniarnertuunngorniarfiup suliakkiissutissat ilinniartitaanerullu qanoq imaqarsimanera pillugu paasissutissat censorimut takuneqarsinnaasunngussavai, tassunga ilisimatitsissutitut aammalu pisariaqarpat oqaaseqarfigisassatut.

*Imm. 2.* Censori suliakkiissutitut tunngasumik massuassutissaqaruni censorip ilinniartitsisoq suliami pineqartoq attavigissavaa, allannguutaasinnaasut pillugit oqaloqatiginarlugu.

*Imm. 3.* Censori ilinniartitsisorlu suliakkiissutit pillugit isumaqatigiissinnaanngippata censori nalunaarummik suliaqarsinnaavoq.

*Imm. 4.* Censorip ilinniartitsissutissanut tunngatillugu allaaserisaq amigaateqarsoriguniuk censoritut nalunaarusiorsinnaavoq.

*Imm. 5.* Ilinniartitsisup censorillu akornanni suliakkiissutissat pillugit imaluunniit ilinniartitsissutissanut allaatigisamut tunngatillugu isumaqatigiinngissutaasinnaasut ilinniartut nalilersorneqarneranni tunngaviginarneqarsinnaanngillat.

*Imm. 6.* Ilinniartitaanermut Naalakkersuisoqarfik censori piumaffigisinnaavaa, soraarummeernerup ingerlanerani, soraarummeernermi suliaassanik il.il. nalilersuilluni allakkiussasoq.

**§ 27.** Suliakkiissutissat atuaqatigiiaanut tamanut atuaqatigiinni ilinniartut amerlassusaanniit minnerpaamik pingasunik amerlanerusassapput. Suliakkiissutissat atuaqatigiiaanut ataatsimut amerlanerpaamik pingasoriarlugit atorineqarsinnaapput.

**§ 28.** Ilinniartut tamarmik ataasiakkaarlutik misilitsinnerup aallartinnerani makitsinikkut suliakkiissutiniq tunineqassapput, ilikkagassanut pilersaarummi allatut allassimasoqanngippat.

*Imm. 2.* Makitsisoqarnerani censori ilinniartitsisorlu tamarmik najuutissapput. Pissutissaqartumik censori najuussinnaanngippat rektori imaluunniit inuk rektorimit toqqarneqartoq censorimut paarlattaasinnaavoq.

**§ 29.** Suliakkiissutini tunniussinerup kinguninguatigut ilinniartup ilikkagassanut pilersaarummi piareersarnissamut piffissaliussaasoq naapertorlugu piareersarnini aallartissavaa.

*Imm. 2.* Ilikkagassanut pilersaarummi imaluunniit misilitsinnerit ataasiakkaat pissusiinit allatut allassimasoqanngippat allatut aalajangersaasoqarsimanngippat, ilinniartuq piareersarnermini ikiorserneqarsinnaanngilaq, tamatumunnga ilanngullugit elektroniskiusumik imaluunniit allatut iliorluni misilitsiffiup avataaniittunut attaveqarnikkut. Ilinniartulli immikkut perorsaanikkut ikiorsiissutini isumagineqartartut imaluunniit atuarnissamik allannissamilluunniit ajornartorsiuteqartut ilinniarnertuunngorniartuup ersarinnerusumik aalajangersagai naapertorlugit ikiorserneqarsinnaapput, tamatumunnga ilanngullugu piareersarnissamut piffissaliussaasup sivitsorneqarneratigut.

*Imm. 3.* Ilikkagassanut pilersaarummi allatut aalajangersaasoqarsimanngippat ilinniartup ikiorsiissutaasartut tamaasa piareersarnermini atorsinnaavai.

**§ 30.** Soraarummeersitsineri ilinniartup ilikkagassanut pilersaarummi allatut allassimasoqanngippat ikiorsiissutit tamaasa atorsinnaavai, tassunga ilanngullugit piareersarnermit allattugaatit, qarasaasiakkoorpata qarasaasiakkoortut atortullu soraarummeersitsineri tunngavissat atorneqartussat.

*Imm. 2.* Soraarummeersitsineq ilikkagassanut pilersaarutini piffissaliussaasup iluani ingerlanneqassaaq. Saneqqutsinerit annikinnerusut pisinnaapput, naliliinissamut tunngavissat patsisigalugit. Ilinniartut immikkut perorsaanikkut ikiorsiissutini atortoqartinneqartut, imaluunniit atuarniarnermikkut allanniarnermikkullu ajornartorsiuteqartut ilinniarnertuunngorniartuup aalajangersagai naapertorlugit sivilisnerusumik piffissalernerqarsinnaapput.

*Suliniutini misilitsinneq, ilinniarnermi suliat aamma pisimasuutitat*

**§ 31.** Suliniutini misilitsinnertut paasineqassaaq suliassiissutaasoq suliniutissatut saqqummiussaasoq, ilinniartup suliassiissut suliniutip ingerlanneratigut akissuteqarfigisaa.

*Imm. 2.* Suliniummi misilitsinneq ingerlanneqassaaq suliniutissatut saqqummiussaasup suliarineqarneratigut, ilikkagassanut pilersaarutaasoq naapertorlugu.

*Imm. 3.* Suliniutissatut suliassiissutaasusaaq nammineq najukkami suliarineqarsimappat, ilinniarnertuunngorniartuup isumannaassavaa, suliassiissut ilinniartup ilikkagassanut pilersaarutaasut naapertorlugit suliaanik naliliinissamut tunngaviusinnaasutut piukkunnartuunersoq qulakkiissallugu, ilikkagassanut pilersaarummi naliliinissamut aalajangersagaasut naapertorlugit.

*Imm. 4.* Suliniummik suliaqartitsineq suleqatigiissitani ingerlanneqassappat, ilinniarnertuunngorniartuup suliaq ingerlannissaanut killiliussassat aalajangersassavai, isumannaarniarlugu inernerusut misilitsittut ataasiakkaarlugit naliliiffiginissaannut tunngaviusinnaanerit.

*Imm. 5.* Suliat ingerlanneqarneranni ilinniarnertuunngorniartuup ilinniartut ataasiakkaarlugit siunnersortassavai, ilikkagassanut pilersaarutini aalajangersagaasut tunngavigalugit.

*Imm. 6.* Ilinniartut avataaniit suliaq ingerlannerani ikiorserneqarsimappata, imaluunniit oqaasertalianik allanit suliarineqarsimasunik atuisimappata, tamanna akisummi ersersinneqassaaq.



**§ 32.** Ilinniarnermi suliatut paasineqassaaq suliassiissut ilinniarnertuunngorniarfimmit ilinniartuq suleqatigalugu suliassiissutigineqarsimasuq qulequttap aalajangersimasup iluani, ilinniartut tamarmik immikkut suliaminnik piffissap suliniummik suliaraqfiusussap naanerani, piffissami atuartitsiffiunngitsumi tunniussassaat.

*Imm. 2.* Suliassiissutip ingerlanneqarnerani ilinniarnertuunngorniarfik ilinniartumut siunnersuisassaaq ilikkagassanut pilersaarutini tamatumunnga aalajangersagaasut naapertorlugit.

**§ 33.** "Case" tassaavoq suliassiissut pissusiviusunut qanittumik aallaavilimmik pissutsinik ajornartorsiutinillu allaaserinninneq, ilinniartut suliassiissummik naalisaalluni imaqaqnersiukkamik saqqummiussinerat, suliassiissummi ajornartorsiutaasut aaqqiissutissaattut siunnersuutininik imaqartoq. Naalisaalluni imaqaqnersiutinertut suliqaq ataasiakkaarluni oqaluinnarluni misilitsinnermi tunuliaqutaassaaq.

## **Kapitali 4**

### *Misilitsittarnerit aaqqissuunneqarneri ingerlanneqartarnerilu*

#### *Akisussaaffik aaqqissuussinerlu*

**§ 34.** Ilinniartitaanermut Naalakkersuisoqarfik pingaarnertut akisussaasuvoq aammalu misilitsittarnerit soraarummeertarnerillu ingerlanneqartarnerat nakkutilliisuuffigalugu.

*Imm. 2.* Rektorip misilitsittarnerit soraarummeertarnerillu ingerlanneqartarnerat ilinniartitaanermut Naalakkersuisoqarfiup killiliussassatut aalajangersagaasa iluanni akisussaaffigaa.

**§ 35.** Ilinniartitaanermut Naalakkersuisoqarfik ukiut tamaasa soraarummeersitsinissanut ullorsiutinik aalajangersaasassaaq, ilinniartut soraarummeernissaata ukiumi pineqartumi qaqugukkut aallartinnissaanik imaqartumik, qaqugukkut misilitsinnerit suliassiissutinik qitiusumiit sularineqarsimasunik imaqartut ingerlanneqarnissaannik imaqartumik, soraarummeerni suliassiissutit il.il. qaqugukkut aallartinneqarlutillu naammassineqarsimanissaannik imaqartumik, kiisalu napparsimaneq pissutigalugu pisariaqarpat qaqugukkut soraarummeertoqarsinnaaneranut piffissaliussanik aamma imaqartunik. Misilitsinnerit sinneri ilinniarnertuunngorniarfimmi namminermit piffissaliussap iluani ingerlanneqassanersut rektorip aalajangissavaa.

**§ 36.** Soraarummeersitsinerit aallartiffiat soraarummeersitsinissanut pilersaarutit tamanut saqqummiunneqarnissaanut piffissaavoq.

**§ 37.** Ilinniartitaanermut Naalakkersuisoqarfiup soraarummeersitsinerni aaqqissuussaannikkut iliuusissat tigussaasut aammalu periusiusussat aalajangersassavaa.

**§ 38.** Ilinniarnertuunngorniarfik piffissanut soraarummeersitsiviusussanut ilinniarfiup pilersaarutaa suliarisassavaa, tassunga ilanngullugu soraarummeersitsinerit qaqugukkut naammassineqarnissaannut piffissaliussaq. Siunnersuusiaq ilinniartitaanermut Naalakkersuisoqarfimmit piffissaliussaasup naannginnerani ilinniartitaanermut Naalakkersuisoqarfimmut ilisimatitsissutitut nassiunneqartassaaq.

*Imm. 2.* Ilinniarnertuunngorniartinni censorit ataasiakkaat ilinniartitaanermut Naalakkersuisoqarfimmit toqqarneqassapput.

*Imm. 3.* Soraarummeernissamut pilersaarutit tamanut takusassiarineqarnissaasa tungaanut pilersaarummut akuusut, tamatumunnga ilanngullugit censoriusussatut naatsorsuutigineqartut nipangersimasussaatitaapput fagit suut misilitsiffiusussaanersut pillugit.

**§ 39.** Piffissanut soraarummeersitsiviusussanut tamanut soraarummeerutissat suunissaat makitsissutigineqartassaaq. Makitsinerup aalajangissavaa fagini sorlarni ukiumi atuarfiusumi ilinniartup misilitsinnissaa.

**§ 40.** Ilinniarnertuunngorniartup ilinniartitaanerup tamarmiusup aammalu misilitsiffissat tamarmiusut ingerlanneqarnissaat imatut aaqqissuuttassavaa,

- 1) fagini misilitsiffiusussatut ilimanaateqartuni nalunaquttap akunneri atuartsiviusussat tamarmik ingerlanneqarsimanissaat, piffissap soraarummeerfiusussap aallartinneqannginnerani, taamaattorli imm. 2 tak.,
- 2) ilinniartup piffissap atuartsitaaffiusup ingerlanerani qaqugukkulluunniit naatsorsorsinnaassanngikkaa misilitsiffissat sorliit pinaviarnagit,
- 3) ilinniakkap naanissaanut ukiup kingulliup tulliaa naanerani misilitsiffiusussaq sioqqullugu minnerpaamik fagit marluk misilitsiffigineqarsinnaasutut ilimanaateqartut naammassineqarsimanissaat,
- 4) fagit qaffasissuseq A-miittut aatsaat naammassineqassasut ilinniakkap ukiumi naaffissaani piffissaq soraarummeerfiusussaq sioqqullugu,
- 5) ilinniartsissutit naammassineqarnissaat agguanneqareersimassasut piffissanut soraarummeerfiusussanut, taamaalilluni misilitsiffiusinnaasut ilinniagaqarnerup naammassiartuaarnerani amerliartuaartunngorlugit,
- 6) ilinniarnertuunngorniartut tamarmik aallaavittut misilitsinnernik arfineq pingasunik ingerlatsisimassasut, kiisalu ilinniarnermi suliamik ataatsimik suliaqarsimassasut, taamaattoq nr. 7 takuuk.
- 7) ilinniarnertuunngorniartut tamarmik ilassutaasunik misilitsissasut, misilitsinnerit arfineq pingasut pineqartut saniatigut, tamanna normu 2-mi eqqaaneqartumik tunngaveqartumik,
- 8) fagit A-mik qaffasissusillit aamma fagit allattariarsorluni misilitsiffiusussat pinngitsooratik minnerpaamik ataasiarluni misilitsiffiunissaat, aamma
- 9) misilitsittoqassanngilaq qaffasissuseq C-miittuni timersornermi, nipilersornermi, science-imi, ilinniarnermi periutitigut aamma assilissanik eqqumiitsuliornermi.

*Imm. 2.* Rektorip immikkut ittumik akuerissavaa, piffissap soraarummeerfiusup aallartinnerata kingorna fagini tamani atuartsisoqassasoq, taamaattorli fagimi pineqartumi soraarummeernissaq sioqqullugu.

**§ 41.** Ilinniarnertuunngorniartfik ukiut tamaasa atuarnerup aallartinnerata kinguinngua piaartumik ilinniartunik ilisimatitsissassaaq ukiumi soraarummeersitsinissat qaqugu aallartissanersut qaqugulu naammassissanersut pillugit.

*Imm. 2.* Ilinniartut tamatumunnga ilutigitillugu ilisimatinneqartassapput ilinniartsissutini tamani misilitseriaatsit atorneqartussatut pilersaarutaasut pillugit, ilinniartsissummi atuartsissutaasumi oqaatsit ilinniartsissutaasut assigiinngissinnaanerit pillugu aammalu ilinniartsissummi pineqartumi misilitsinnermi oqaatsit atorneqartussat pillugit, takuuk § 48, aammalu ilinniarnertuunngorniartup

soraarummeertarnermut malittarisassai pillugit, malittarisassanilu ilaatinneqartussat makkua pillugit:

- 1) Napparsimaneq aamma takkutinngitsoorneq tamatumalu kingunerisassai.
- 2) Ikiorssiissutit.
- 3) Takkussimanissaq.
- 4) Misilitsinnerup nalaani atassuteqaqatigiinnernut.
- 5) Peqquserlunnerup suunerata nassuiaataa kingunerisassaalu.
- 6) Maalaaruteqarnissamut periarfissat periaatsillu.
- 7) Atugassarititaasut, assersuutigalugu qarasaasiamik il.il. atuisinnaaneq.

*Imm. 3.* Soraarummeersitsinissat aallartiffianni ullormi ilinniartut aammaloorluni ilisimatinneqassapput misilitsissutaasussanik makitsinerup inernerisai pillugit aammalu misilitsinnissanut piffissaliussaasut pillugit.

**§ 42.** Ilinniartoq fagip ilinniarneqartup naammassinissaanut inassutigineqassaaq.

*Imm. 2.* Inassuteqarnissamut tunngaviussaaq ilinniartup atuartitaanermut malinnaasimanera, tassunga ilanngullugu allattariarsorluni suliassanik suliassiissutaasimasunik tunniussisarsimanera, allattariarsorlunilu suliakuerineqarsimanerat, ilinniarnertuunngorniarfimmi tamatumunnga malittarisassat atuuttut naapertorlugit. Taamaattoqarpat, ilinniartoq ingerlaannartumik inassutigineqassaaq.

*Imm. 3.* Ilinniartoq, ilinniartitsissummi ataatsimi arlalinniluunniit misilitsinnissamut inassutigineqanngitsoq piffissap soraarummeerfusussap aallartinnginnerani tamatuminnga ilisimatinneqassaaq.

*Imm. 4.* Ilinniartut, ilinniartitsissummi ataatsimi allami soraarummeerutigisimasaminnik nuutsinissamut tamakkiisumik akuerineqarsimasut aammaarlutik qaffasissutsimi tassani soraarummeeqqinnissaminut inassutigineqarsinnaanngillat.

**§ 43.** Nammineerluni ilinniartoq, tassunga ilanngullugu ilinniartoq ilinniarnertuunngorniarfimmi ilinniagaqarnissamut akuerisaasimasooq aamma nammineq ilinniartutut misilitsinnissamut innersuunneqarsimasooq, ilinniartitsissummi ataatsimi amerlanerusuniluunniit misilitsinnissamut nalunaarsinnaavoq.

*Imm. 2* Ilinniarnertuunngorniarfiup nammineerluni ilinniartoq soraarummeernerup ingerlanissaa pillugu siunnersussavaa, misilitsinnissamilu tunngaviusut suunerinik oqaluttuullugu.

*Imm. 3.* Ilinniartitaanermut Naalakkersuisoqarfik aalajangersaasinnaavoq piffissaliussanik nammineerluni ilinniartuusut misilitsinnissamut qinnuteqarnissaannut tunngaviususanik.

#### *Misilitsinnerit ingerlanneqarnerat*

**§ 44.** Oqaluttariarsorluni misilitsinnerit suliniutinillu suliaqarnerup oqaluttariarsornikkut misilitsiffigisassartai aamma suliniutit imaluunniit misissuinerit (cases) pillugit oqaluttariarsorluni misilitsinnerit tamanut ammasuusarput, ilinniarnertuunngorniarfiup aalajangiinerata kingunerisaanik pissutsinik immikkut ittunik atuuttoqarsimanngippat, tamanut ammasumik ingerlanneqarnissaanut akornutaasinnaasunik, imaluunniit ilinniartoq nammineq tamanut ammasumik ingerlatsisoqarnissaanut killiliinissamik kissaateqarsimanngippat.

*Imm. 2.* Oqaluttariarsorluni misilitsittoqareerneratigut karakteriliiniarluni nalilersuinermi censori aamma soraarummeersitsisoq kisimik najuutissapput.

**§ 45.** Nipinik aamma assilissanik misilitsittoqarnerata nalaani immiussisoqarsinnaanngilaq, tamanna misilitsinnerup ilaginngippagu.

**§ 46.** Ilinniarnertuunngorniarfiup soraarummeertut sulinermikkut misilitsinnerup nalaani naammaginantunik atugassaqartissavaat, tamatumunnga ilanngullugu ilinniarnertuunngorniarfiup pitsaanerpaamik aaqquissuunniassavaa soraarummeertut pisariaqanngitsumik attaveqatigiissinnaanerat.

**§ 47.** Ilinniartuq, piffissaliussap iluani misilitsinnissamut takkutinngitsoq ilinniarnertuunngorniarfimmii misilitsinnermut peqataanissamiit mattunneqarsinnaavoq.

*Imm. 2.* Mattussineq tunngavilersorneqarsinnaasariaqarpoq ilinniartup illersorneqarsinnaasumik misilitsinnermik ingerlatsisinnaannginneranik, imaluunniit inortuilluni aggernerup ilinniartut sinnerinut akornusersuutaasinnaaneranik.

*Imm. 3.* Inortuilluni takkunneq naammaginantumik tunngavissaqartinneqarpat, ilinniarnertuunngorniarfik aalajangersinnaavoq ilinniartuq nutaamik misilitsissinnaasoq, napparsimasutut misilitsinnerusumik.

**§ 48.** Misilitsinnerit nalinginnaasumik ingerlanneqartarput ilikkagassanut pilersaarutini allatut allassimasoqanngippat oqaatsit ilinniartitsissummi atuartitsissutaasimasut atorlugit. Censori oqaatsinik atuartitsissutaasimasunik naammaginantumik atuisinnaanngippat, misilitsinneq illersorneqarsinnaasumik qaffasissuseqartinneqarsinnaavoq oqaatsit censorimit atorneqartut aamma oqaatsit ilinniartitsissutaasut akuleriissillugit atorneqarnerisigut. Oqaatsit assigiit censorimit misilitsittumiillu atorneqarsinnaappata, oqaatsit taakku ilinniartitsinnermi oqaatsit atorneqartunut akulerullugit atorneqarsinnaapput.

*Imm. 2.* Ilinniartitsissutini oqaasileriffusuni misilitsinneq kalaallit aamma danskit oqaasii akuleriissillugit atorlugit ingerlanneqarsinnaavoq.

**§ 49.** Ilinniarnertuunngorniarfik misilitsittarnermut malittarisassanik suliaqassaaq, tamatumunnga ilanngullugu ilinniartut allattariarsorlutik misilitsinneranni nakkutilliisoqartarnek pillugu. Tamannalu pissaaq Ilinniartitaanermut Naalakkersuisoqarfiup killiliussatut aalajangersagai naapertorlugit, tak. § 37.

*Imm. 2.* Misilitsittarnermut malittarisassat imatut suliarineqarsimassapput, ilinniartut innarluuteqartut aammalu ilinniartut immikkut perorsaataasumik aaqquissuussaavigineqarsimasut misilitsissinnaanngorlugit atugassarititaasut immikkut ittut iluanni, ilinniagaqartup pisariaqartitsineranut naapertuuttumik aaqquissuussaasut.

**§ 50.** Ilinniartut, misilitsinnermi pineqartumi malittarisassanik malinninngitsut, tamatumunnga ilanngullugit pissusissarititaasut sanioqqullugit ikiorsiisut imaluunniit ikiorneqartut, piaaralutik allat allagaataannik namminnek suliarisimasamittut saqqummiussisut imaluunniit atortorissaarutininik iluaqutissanik akuersissutaanngitsunik atuisut misilitsinnermiit anisinneqassapput.

*Imm. 2.* Censorit anisitsinissaq pillugu aalajangiisinnaanngillat, kisiannili taamaallaat rektorimut tunngavilersukkamik anisitsinissaq pillugu inassuteqarsinnaallutik. Tamatumunnga ilanngullugu censori nalunaarummik tunniussaqaarsinnaavoq, § 77 tak.

§ 51. Anisitsisoqarnissaa pillugu censori inassuteqarsimagaluaruniluunniit censori ilinniartup misilitsinnerani nalileeqataassaaq, ilinniarnertuunngorniarfik aalajangersimappat naliliinermik ingerlatsisoqassasoq.

§ 52. Pissutsit immikkut ittut tamatumunnga pissutissaqartitsippata misilitsinnerit allami ingerlanneqarsinnaapput, tamatumunnga ilanngullugu illoqarfimmi allami nunamiluunniit allami. Misilitsinnerit qarasaasiat aqqutigalugit ingerlanneqarsinnaapput.

*Imm. 2.* Rektorip isumannaassavaa misilitsinneq allami ingerlanneqartoq illersorneqarsinnaasumik ingerlanneqarsinnaasoq, tamatumunnga ilanngullugu soraarummeersitsisup censorillu piumasarineqartutut piginnaaneqarneri, aammalu ilinniartumut piumasarisat atugassarititaasullu nalinginnaasumik ileqqusunut naapertuuttuunerat.

§ 53. Misilitsinnerup ingerlanneqarnerani kingornaluunniit paasineqarpat misilitsissutaasoq kukkuneqartoq imaluunniit amigateqartoq, taava ilinniarnertuunngorniarfik aalajangiissaaq iluarsineq qanoq isumagineqassanersoq, tamatumunnga ilanngullugu misilitsinneq taamaatiinnarneqassanersoq kingusinnerusukkullu nutaamik piffissaliilluni ingerlanneqarluni. Periarfissaqarpat ilinniarnertuunngorniarfiup aalajangiineq sioqullugu nalilersuisut isumasiorsimassavai.

*Imm. 2.* Aaqqiissuteqarneq imatut suliarineqassaaq ilinniartut misilitsinnerminni nalinginnaasumik atugassarititaasunut nallersuunneqarsinnaasunik atugaqarsinnaanngorlugit, tassunga ilanngullugu assersuutigalugu piffissap soraarummeerfiusussap sivitsorneqarneratigut.

*Imm. 3.* Ilinniarnertuunngorniarfiup nalilerpagu kukkussut ilinniartut naammassisaannut sunniuteqartoq, ilinniartut kukkunermit eqqorneqartut neqeroorfigineqassapput naliliiffiqeqqinneqarnissamik imaluunniit misilitseqqinnissamik.

*Imm. 4.* Ilinniarnertuunngorniarfiup nalilerpagu kukkuneq annertuujusoq, rektorip misilitsinnerup ingerlasimanera ilinniartitaanermut Naalakkersuisoqarfimmut nalunaarutigissavaa, tassanngaaniillu aalajangiisoqarsinnaavoq misilitsinneq atorunnaarsinneqassanersoq taamalu misilitsinnermik nutaamik taarserneqassanersoq.

*Imm. 5.* Misilitsinnermi suliasat kukkunillit ilinniartitaanermut Naalakkersuisoqarfimmit suliaappata imaluunniit piniagaasimappata, ilinniartitaanermut Naalakkersuisoqarfiup imm. 1-3-mi suliasat isumagissavai.

*Imm. 6.* Censori kukkunerit pillugit ilisimatinneqassaaq, misilitsinneq ingerlatiinnarneqarpat.

## Kapitali 5

### Naliliineq

#### Ataatsimut aalajangersakkat

§ 54. Nalilersuineri Greenlandic Grading System skala atorlugu karakteriliisoqartassaaq.

§ 55. Ilinniartut tamarmik immikkut naliliivigineqartassapput misilitseriaaseq atorineqartoq apeqqutaatinagu.

§ 56. Suliassiissutit anginerit aamma suliniutit ilinniartut suliarineqarnerini peqataaffigisaat tamarmik immikkut naliliivigineqartassapput.

*Ingerlaavartumik nalilersuisarneq*

§ 57. Ilinniartup ilinniakkatigut piginnaasai ilinniarnertuunngorniarfiup iluani misilitsinnermit karakterit, angusat, tassunga ilanngullugit oqaasiinnartigut allattariarsornikkullu oqaaseqaatit kiisalu angusanut tunngatillugu karakterit atorlugit nalilersorneqassapput.

*Imm. 2.* Naliliinermit ilinniartup nammeneq naliliinera anguniagaalu akulerunneqartassapput.

§ 58. Angusanut tunngatillugu karakterit ersersissavaat ilinniartup anguniagaasunik, ilinniartitsissutitigut anguniagaasunik, ilinniartitsissummi pineqartumi ilikkagassanut pilersaarutaasumi periutsinut imarisaanullu tunngasutigut piffissami karakteriliiffiusumi qanoq angusaqarsimanersoq.

§ 59. Ilinniarnertuunngorniarfiup iluani nammeneq misilitsinnerni karakteriliinerit ersersitsissapput ilinniartut ataasiakkaarlutik ilinniartitsissutitigut ilisimasaannik, suliassiissutit tunngavigalugit ilisimasaqassutsimik, periaatsinillu atuisinnaanikkut angusaqarsimassusiannik.

§ 60. Oqaluttariarsorluni aamma allattariarsorluni oqaaseqaatit ersersitsissapput ilinniartut ataasiakkaarlutik ilinniartitsissutitigut ilisimasassanik suliassiissutaasut tunngavigalugit ilinniartitsissummi pineqartumi angusaqarsimassusiannik. Tassunga ilaassaaq ilinniartup angusaanut tunuliaqutaasut pillugit nassuiaat, aammalu ilinniartup ilinniartitsissummi pineqartumi qanoq sulinerminik ingerlatseqqissinnaanera pillugu nassuiaammik ilaqarsinnaalluni.

*Inaarutaasumik naliliineq*

§ 61. Soraarummeernermit karakteriliisoqartassaaq censorip peqataaneratigut.

§ 62. Ilinniartut angusanut tunngatillugu ilinniartitsissutini tamani karakteriliinikkut, taamaattoorli § 14, imm. 2 takuuk, aammalu ilinniartitsissutini misilitsiffiusuni misilitsinnermit karakteriliinikkut inaarutaasumik angusanut tunngatillugu karakterilerneqartassapput.

*Imm. 2.* Fagini tullinnguuttuni allattariarsornikkut angusanut ataatsimik karakteriliisoqassaaq aamma oqaluttariarsornikkut angusanut ataatsimik karakteriliisoqassaaq.

- 1) Fagi allattariarsorluni misilitsiffigineqartussaaq.
- 2) Matematik C aamma B.
- 3) Uumassusilerineq B.
- 4) Fysik B.
- 5) Kemi B.
- 6) Nunalerineq B.

*Imm. 3.* Fagini allani tamani kiisalu inuussutissarsiorneq pillugu casemi atuortoq angusanut tunngatillugu ataatsimoortumik ataatsimik karakterilerneqassaaq.

**§ 63.** Naliliinerup ersersippaa qanoq annertutigisumik ilinniartup ilinniartitsissutini ataasiakkaani ilikkagassanut pilersaarutaasunik angusaqarsimanera.

*Imm. 2.* Kiisalu naliliinermi akulerunneqassapput nalilersuinissamut tunngavissiat ilinniartitsissummi pineqartumi ilikkagassanut pilersaarummi ersittut.

**§ 64.** Inaarutaasumik angusanut tunngatillugu karakterit ilinniartitsissutip pineqartup naammassineqarneranut atatillugu ilinniartitsissummi ilinniartitsisuusumit tunniunneqassapput.

*Imm. 2.* Inaarutaasumik angusanut tunngatillugu karakterit ilinniartumut ilisimatitsissutigineqassapput soraarummeernissamut pilersaarutip tamanut saqqummiunneqannginnerani. Ilinniarnertuunngorniarfulli piffissaliussaq taanna kinguartissinnaavaa, tamanna ilinniartitsissutini ataasiakkaani pissutissaqartumik pisariaqartinneqarpat.

*Imm. 3.* Inaarutaasumik angusanut tunngatillugu karakteriliisoqarneq ajorpoq 1. semesterimi ilinniarnermi sulianut (studieprojekt), ilinniarnermi periutsini aamma timersornermi.

*Imm. 4.* Nammineerlutik ilinniartunut inaarutaasunik angusanut tunngatillugu karakteriliisoqarneq ajorpoq.

*Imm. 5.* Fagini misilitsiffiusussanngorlugit iliuuseqarfigineqarsimasuni inaarutaasumik angusanut tunngatillugu karakteriliisoqarneq ajorpoq, Ilinniarnertuunngorniarfinni ilinniarnermut ileqqorissaarnermullu malittarisassat pillugit Namminersorlutik Oqartussat nalunaarutaanni nr. 10, 23. juli 2012-imeersumi § 9, imm. 1 nr. 4 tak.

*Immi. 6.* Fagimi ilinniartitsisoq ilinniartup atuanngitsoortarneri pissutigalugit ilinniartumik nalilersuisinnaanngippat, ilinniartitsisoq ilinniarnertuunngorniarfiup iluani misilitsitsinnaavoq, ataatsimut naliliinermi misilitsinnerup inernerata affaanut tunngaviliisussamik.

**§ 65.** Ilinniartuq ilinniarnertuunngorniarfimmu allamut nuuttoq imaluunniit ilinniakkap sammivianik allannguisoq, taamaasillunilu ilinniartitsissutini qaffasissuseq B imaluunniit A-miittunik naammassinninnissaminut periarfissaaruttoq, ilinniarnertuunngorniarfiup allagartanik tunniussisussaasup ilinniartitsissutitigut tamanna tunngavissaqartippagu, angusanut tunngatillugu karakterit ilinniartitsissummi inaarutaasumik angusanut karakterit ilinniartitsissummi killiffimmi appasinnerusumut nuutsissinnaavai.

**§ 66.** Ilinniartut allattariarsorluni misilitsinnerni angusaat ataatsimoorullugit censorinit marlunnit nalilersorneqartassapput.

*Imm. 2.* Oqaluttariarsorluni misilitsinnerni ilinniartut angusaat ataatsimoorullugit censorimit soraarummeersitsisumillu nalilersorneqartassapput, taamaattorli § 78, imm. 3 tak.

*Imm. 3.* Misilitseriaatsini allani ilinniartut naliliiffigineqarneri ilikkagassanut pilersaarummi allaaserineqartut naapertorlugit ingerlanneqartassapput.

*Imm. 4.* Karakterit naliliinermi tunniunneqartut karakterit allattorsimaffiannut uppersarneqartassapput, taannalu nalilersuisunit atsiorneqassaaq.

**§ 67.** Nalilersuisut ataatsimut karakteriliinissaq isumaqatigiissutigisinnaanngikkunukku tamarmik immikkut karakteriliisassapput. Inaarutaasumik karakteriliineq agguqatigiissitsinikkut akunnaalliliilluni

tunniunneqartassaaq.

*Imm. 2.* Karakterit ataasiakkaat kiisalu inaarutaasumik karakteriliineq karakterinut allattorsimaffimmi saqqummersinneqassapput.

*Imm. 3.* Oqaluttariarsorluni misilitsinnermi ilinniartumik karakteriliinerup inernera ingerlaannartumik ilinniartumut nalunaarutigineqartassaaq.

*Imm. 4.* Allattariarsorluni suliani annertunerni karakteriliinissamut naliliineq kingusinnerpaamik misilitsinnermi suliap tunniunneqarneraniit sapaatip akunneri arfinillit qaangiutsinnagit suliarineqareersimassaaq.

**§ 68.** Rektorip pisuni immikkut illuinnartuni ilinniartup ilinniarnernup ingerlanerani misilitseqqinnissaa akuerisinnaavaa, ilinniartup ilinniarnertuutut soraarummeernerminik angusinissaanut pingaaruteqarluinnarpat imaluunniit ilinniartup ingerlaqqiffusumik ilinniakkami aalajangersimasumi tigusaanissamut periarfissaanut pingaaruteqarluinnarpat.

#### *Nalileeqataasut*

**§ 69.** Ilinniartitsissummi pineqartumi censorit ilinniartitsissummi pineqartumi atuartitsisinaanermut tunngatillugu malittarisassani piumasarineqartut naammassisinnaassavaat, anguniarneqassaarlut censorip ilinniartitsissummi pineqartumi atuartitsisarnermik misilittagaqarnissaa, ilinniartitsissummi pineqartumi qaffassusermi aammalu ilinniartitsissummi pineqartumi misilitsittoqartarneranut tunngatillugu misilittagaqarnissaa.

**§ 70.** Censorit nipangersimasussaaitaanermut nalinginnaasumik malittarisassat eqqortissavaat.

*Imm. 2.* Censori ukiuni kingullerni pingasuni ilinniartitsissummi pineqartumi ilinniartunut ilinniartitsisuusimasinnaanngilaq, aammalu censori ilinniarfimmi misilitsiffiusumi atorfeqarsinnaanngilaq, taamaattoorli § 72 takuuk. Kiisalu censorit suliamut akuusimannginnissamut piumasaqaatinik nalinginnaasunik naammassinissinnaassaaq.

**§ 71.** Ilinniartitaanermut Naalakkersuisoqarfiup censorinik atuneq taakkualu toqqarneqartarnerat ataqatigiissaagarissavaa.

*Imm. 2.* Ilinniarnertuunngorniartfik ilinniartitaanermut Naalakkersuisumut ilinniarfimmi censorinik atuinissaq pillugu inassuteqarsinnaavoq.

**§ 72.** Censori tassanngaannartumik pisinnaajunnaarpat, imaluunniit pissutsinik takkuttoqarpat censorip misilitsittoqarnissaanut takkussinnaajunnaarneranik kinguneqartumik, ilinniartitaanermut Naalakkersuisoqarfik censorimik taartaasussamik toqqaasinnaavoq, tamatumani aamma censorimik ilinniarfimmi soraarummeersitsiffiusumi atorfeqartumik.

*Imm. 2.* Taartaasutut censorissap sapinngisamik annertunerpaatigut censorinut piumasaqaatit taava naammassisinnaasariaqarpai.

**§ 73.** Censorip nakkutigissavaa, periarfissaqarpallu peqataaffigalugu

1) misilitsinnerit ingerlanneqassasut fagitigut naleqquttumik aaqqissuussaallutik,



2) misilitsinnerit malittarisassat atuuttut naapertorlugit ingerlanneqassasut,  
3) soraarummeertut assigiimmik, naapertuilluartumik tatiginartumillu nalilersuiffiqineqassasut,  
ilinniartitaanerit malittarisassaannut naapertuuttumik, tamatumunnga ilanngullugu ilikkagassanut  
pilersaarutit karakteriliisarnermilu nalunaarut naapertorlugit.

**§ 74.** Censori soraarummeersitsisuusup aqutaanik soraarummeertumut apeqquteqartarsinnaavoq.

**§ 75.** Allattariarsorluni misilitsittoqarnerani Ilinniartitaanermut Naalakkersuisoqarfiup systemimi  
suliassanik aallertarfittut tunniussisarfittullu akuerisaani karakterit allattorsimaffiata eqqortumik  
immersornissaa censorip qulakkiissavaa.

**§ 76.** Censorip soraarummeersitsisoqarnerani pisunut tunngatillugu nalunaarsuutini allattuissaaq,  
kingusinnerusukkut nalunaaruteqartariaqassaguni imaluunniit maalaaruteqartoqassagualarpat  
atorneqarsinnaasunik. Allattugaatit minnerpaamik ukioq ataaseq toqqortarinqassapput.

**§ 77.** Censori isumaqaruni misilitsinnermi isornartoqartoq, censoritut nalunaarummik suliaqassaaq,  
taannalu rektorimut, Ilinniartitaanermut Naalakkersuisoqarfimmut kopiilerlugu nassiunneqassaaq.  
*Imm. 2.* Rektorip censorip nalunaarusiaa Ilinniartitaanermut Naalakkersuisoqarfimmut nassuiaatiminik  
ilallugu nassiutissavaa.

*Imm. 3.* Censori qinnuigineqaruni misilitsittoqarsimanera pillugu, inernerusullu pillugit  
nalunaarusiussaaq.

#### *Soraarummeersitsisut*

**§ 78.** Rektorip soraarummeersitsisussaaq toqqassavaa.

*Imm. 2.* Immikkut ittumik pissutsinik atuuttoqanngippat soraarummeersitsisoq ilinniartitsisut  
ilinniartunik atuartitsisuusimasut akornanniit toqqarneqassaaq.

*Imm. 3.* Ilinniartitsissutini arlaqartuni misilitsittoqarnerani rektori soraarummeersitsisunik marlunnik  
toqqaasinnaavoq, tamanna ilinniartitsissutit ilinniartitsissutaasimasut tunngavigalugit siammasissumik  
naliliinermi peqataasoqarnissaa pisariaqartinneqarpat.

**§ 79.** Soraarummeersitsisoq tassangaannartumik pisinnaajunnaarpat, imaluunniit pissutsinik  
takkuttoqarpat soraarummeersitsisup misilitsittoqarnissaanut takkussinnaajunnaarneranik  
kinguneqartumik, rektori soraarummeersitsisussamik taartaasussamik toqqaasinnaavoq.

**§ 80.** Censorimut ilisimatitsissutitut ilinniartullu soraarummeernissaminut piareersarnerannut  
atugassatut soraarummeersitsisuusup isumannaassavaa piffissap soraarummeersitsiviusup  
aallartinnerani ilinniartitaanerit allaaserineqarnerannik suliaqartoqarsimanissaa, atuartitaanermi  
sorpiat sammeneqarsimanerannik allaaserinnittut.

**§ 81.** Soraarummeersitsisuusup soraarummeersitsineq aqussavaa isumannaassallugu  
soraarummeersitsinnermi allattaaviup eqqortumik immersorneqarsimanissaa.

**§ 82.** Soraarummeersitsisusoq soraarummeersitsinermi allattuissaaq rektorimut nalunaarusiortoqarsinnaaneranut atorneqarsinnaasunik. Allattugaatit minnerpaamik ukioq ataaseq toqqortarineqassapput.

**§ 83.** Soraarummeersitsisusoq piumaffigineqarnini tunngavigalugu soraarummeersitsinerup ingerlasimanera pillugu nalunaaruteqassaaq.

## **Kapitali 6**

### *Uppernarsaaneq*

#### *Soraarummeersimanermut uppersarsaat*

**§ 84.** Soraarummeernermi ilinniartut angusisimasut soraarummeersimanermut uppersarsaammik tunineqassapput.

*Imm. 2.* Soraarummeernermit uppersarsaat misilitsinnerni karakterinik, angusanut tunngatillugu karakterinik aamma ilinniartut ataasiakkaarlutik suliniutaannut karakteriliinernik imaqtartassaaq, taamaattoq § 88 tak.

*Imm. 3.* Soraarummeersimanermut uppersarsaammik karakterit soraarummeernermi inernerusut naatsorsorneqarneranni assigiimmik naleqassapput, teknikkimi ilinniartitsissummi A-mi misilitsinnermi karakteri aamma suliniummik suliaasimasut karakteri eqqaassanngikkaanni, taakku marloriaammik naleqartinneqassammata.

**§ 85.** Ilinniartunut ilinniarnertuunngorniarfimmi ilinniartitsissutini naammassinnittunut imaluunniit ilinniarnertuutut soraarummeernatik ilinniarnerminnik taamaatitsisunut ilinniarnertuunngorniarfik tamanna pillugu atsiukkanik (attestation) suliaqassaaq, tassanilu paasissutissiisoqassaaq ilinniartup atuartaaneq sutigit malinnaaffigisimaneraa aammalu ingerlaavartumik naliliisarnerit qanoq inerneqartarsimanersut, kiisalu ilinniartup nalilernerqarnermi paasissutissat allat naleqquttut ilanngunneqartussatut kissaatigisai. Atsiorneq aamma paasissutissanik allanik imaqsinnaavoq, atuartup ilinniartitsissummi qaffasissutsikkut killiffianik naliliinissamut allat tunuliaqutaqarnerannut iluaqutaasinnaasunik.

**§ 86.** Rektorip akisussaaffigai allagartat uppersarsaatillu Ilinniartitaanermut Naalakkersuisoqarfiup killiliussaasa iluanni tunniunneqarnissaat.

*Imm. 2.* Ilinniartitaanermut Naalakkersuisoqarfik allagartat uppersarsaatit ilusissaannik aalajangersaasassaaq, aammalu atsiukkat ilusissaliussallugit.

*Imm. 3.* Uppersarsaatit atsiukkallu paasissutissanik allanik imaqassanngillat ilinniartitaanermut Naalakkersuisup uppersarsaasiinernut atsiukkanillu tunniussinernut ilusissarititaasutut saqqummersitaata saniatigit, tamatumunnga ilanngullugu misilitsinnermi immikkut atugassaqtitsisimanermut tunngasunik imaqtassanatik.

**§ 87.** Uppersarsaatit atsiuinerillu kalaallisut, danskisut aamma tuluttut oqaasertaligaassapput.

**§ 88.** Soraarummeersimanermut allagartami karakterit ilinniartup ilinniartitsissutinit allami ilinniagaaniit nuunneqarsimasinnaasut aamma nalunaarneqarsimassapput.

**§ 89.** Ilinniarteq karakterinik nuussinikkut angusaqarsimappat, tamanna soraarummeersimanersut uppersaammi nalunaarneqassaaq.

*Imm. 2.* Ilinniarteq ilinniartitsissummi karakterinik nuussinertaqanngitsumik ingerlaqqissimappat, tamanna soraarummeersimanermut uppersaammi nalunaarneqassaaq, ilinniartitsissutinilu soraarummeernermit inernerusut naatsorsorneqarneranni ilaatinneqassanani.

**§ 90.** Ilinniarteq fagimi qaffasissutsit arlaqartut iluanni misilitsittarsimappat karakterit qaffasinnerit kisimik soraarummeersimanermut uppersaammi ilaatinneqassapput.

*Imm. 2.* Ilinniarnertuunngorniarfik piumaffigineqaruni misilitsinnerit qaffasissutsit sinneriniittut pillugit misilitsissimanermut uppersaammik suliaqassaaq.

**§ 91.** Ilinniarteq ilinniartitsissummi pineqartumi arlaleriarluni misilitsittarsimappat, tassunga ilanngullugu ilinniartup uteqqiisimaneratigut, karakteri qaffasinnerq soraarummeersimanermut uppersaammi ersersinneqassaaq, ilinniartup maalaaruteqarsimanerata kingunerisaanik misilitsinnermik uteqqiisimanngippat. Taamaattoqarsimappat misilitsiqqinnermit angusat soraarummeernermit uppersaammi nalunaarneqassapput.

**§ 92.** Ilinniarteq nammineerluni ilinniartutut misilitsissimappat, tamanna soraarummeernermit uppersaammi nalunaarutigineqassaaq.

**§ 93.** Soraarummeernermit karakteri agguaqatigiissitsinerusooq karakterit tamarmiusut tunngavigalugit soraarummeernermit uppersaammi nalunaarutigineqassaaq, taamaattoq § 84, imm. 3 takuuk.

**§ 94.** Ilinniarteq ilinniakkami ilaatut qaffasissuseq A-mi fagit marluk sinnerlugit ingerlatsisimaguni, ilinniarteq bonusisiassanik aaqqissuussinermi A-miittunik pissarsiassaqassaaq, tamatumalu kingunerissavaa ilinniartut qaffasissuseq A-mi katillugit ilinniartitsissutinik pingasunik ingerlatsisimasut soraarummeernermit angusaqassasut soraarummeernermit agguaqatigiissitsinikkut angusat 1,03-mik amerlisarnerisigut.

*Imm. 2.* Ilinniarteq qaffasissuseq A-mi ilinniartitsissutinik sisamanik amerlanernilluunniit ingerlataqarsimappat soraarummeernermit agguaqatigiissitsinermit 1,06-imik amerlisaasoqassaaq.

**§ 95.** Soraarummeernermit inernerusut soraarummeernermit uppersaammi allanneqassapput decimalinut marlunnut akunnaallillugu.

**§ 96.** Ilinniarnertuunngorniarfik tamanna pillugu atuartup noqqaaneratikut ilinniartitsissutinut ataasiakkaanut uppersaatinik ilinniartunut ilinniartitsissutini ataasiakkaani naammassisaqarsimasunut uppersaatinik tunniussaqaassaaq, aamma ilinniartunut ilinniarnertuunngorniarnermik naammassinissimanngitsunut imaluunniit soraarummeernermit angusisimanngitsunut.

*Imm. 2.* Ilinniartitsissutini ataasiakkaani misilitsissimanermut uppersarsaammi nalunaarneqassapput naammassissat misilitsinneq imaluunniit misilitsinnerit naammassineqarsimasut pillugit aammalu angusanut tunngatillugu karakteriliineq inaarutaasoq ilinniartitsissummi pineqartumi tunniunneqarsimasoq.

*Imm. 3.* Ilinniartitsissutini ataasiakkaani misilitsissimanermut uppersarsaat paasissutissanik imaqaassaaq ilinniartitsissummi angusisoqarsimanersoq angusisoqarsimannginnerlorluunniit pillugu.

*Imm. 4.* Ilinniartitsissut angusiffiusimassaaq karakterini agguaqatigiissitsineq uppersarsaammi nalunaarneqarsimasoq minnerpaamik E-uppat. Ilinniartitsissut angusiffiusinnaanngilaq agguaqatigiissitsinerup akunnaalliinnarneratigut.

**§ 97.** Soraarummeersimanermut uppersarsaatit ilinniarnertuunngorniartup naammassinneraniit sapinngisamik piaartumik suliarineqassapput.

**§ 98.** Misilitsinnermut imaluunniit soraarummeersimanermut uppersarsaat ataasiinnaq allaqqaarneratut (original) tunniunneqarsinnaavoq.

*Imm. 2.* Ilinniarnertuunngorniartup qinnuteqartoqarneratigut uppersarsaatip assilinqarneranik (kopi) tunniussisinnaavoq, allaqqaarnera tammarsimappat. Assilinqarnerata eqqussusia ilinniarnertuunngorniartupmiit uppersarsarneqassaaq.

**§ 99.** Paasissutissat uppersarsaatinik atsiukkanillu tunniussisarnermi tunngavigineqartut ilinniarnertuunngorniartupmi toqqortaatigineqassapput minnerpaamik soraarummeernermit misilitsinnermiilluunniit ukiuni 30-ni.

*Imm. 2.* Ilinniarnertuunngorniartup atorunnaassappat, imaluunniit allanik pissuteqartumik pappialaatit paasissutissat toqqortarineqarsinnaanngippata, imm. 1 naapertorlugu, ilinniarnertuunngorniartup isumannaatsumik toqqortarineqarnissaat isumannaassavaa.

#### *Soraarummeernermi uppersarsaatinik tunniussisarnermi piumasaqaatit*

**§ 100.** Soraarummeersimanermi uppersarsaatinik ilinniartunut ilinniarnertuunngorniartuni ilinniakkamik naammassinissimasunut tunniussisoqartassaaq, tamatumunga ilanngullugit allami soraarummeerutigisimasanik nuussisinaanermut nalunaarut naapertorlugu nuussisimasunut, ilinniartoq minnerpaamik E-mik soraarummeernermi agguaqatigiissitsinikkut angusaqarsimagaangat.

**§ 101.** Ilinniarnertuunngorniartup ilinniartup ilinniarnertuunngorniarnerninik naammassiniffigisaa, soraarummeersimanernut uppersarsaammik ataatsimoortumik suliaqassaaq ilinniartunut ini tamani ilinniarfusinnaasutut akuerisamillu misilitsiffusinnaasunut misilitsissimanerminnut uppersarsaatinik tunniussisunut, misilitsissimanermi karakterit minnerpaamik E-usimappata.

**§ 102.** Ilinniartoq ilinniarnertuunngorniartarnermut malittarisassani fagit tulleriinnerinik sanioqquatsinissamat akuerineqarsimagaangat, ilinniartorlu soraarummeernermini minnerpaamik E-mik akunnaalliliinertaqanngitsumik angusaqarsimagaangat, ilinniarnertuunngorniartup ilinniartumut soraarummeersimanermut uppersarsaammik tunniussisassaaq.

*Imm. 2.* Soraarummeersimanermut uppersarsaammik immikkut akuersissuteqarnermut aalajangerneq nalunaarutigineqartassaaq.

**§ 103.** Soraarummeersimanermut uppersarsaammik tunniussinissamut agguaqatigiissitsineq minnerpaamik E-uppat, agguaqatigiissitsineq akunnaalliliinikkut anguneqarsinnaanngilaq.

## **Kapitali 7**

### *Naammagittaalliorneq*

#### *Misilitsinnernut tunngasut*

**§ 104.** Ilinniartuq tunngavilersukkamik nammineerluni misilitsissimanermi karakterit pillugit naammagittaalliuuteqarsinnaavoq. Ilinniartuq angajoqqaatut oqartussaassuseqartunit oqartussaaffigineqarpat, angajoqqaatut oqartussaassuseqartut naammagittaalliuuteqarsinnaapput.

*Imm. 2.* Naammagittaalliuut Ilinniartitaanermut Naalakkersuisoqarfimmut allagartalligaassaaq ilinniarnertuunngorniarfimmullu tunniunneqassalluni.

*Imm. 3.* Naammagittaalliuut kingusinnerpaamik ilinniartup karakteriminik paasitinnerqarneraniit sapaatip akunnerisa marluk qaangiunneranni tunniunneqarsimassaaq.

**§ 105.** Ilinniarnertuunngorniarfup naammagittaalliortoq maalaarsinnaanermut ilitsersussavaa, tamatumunga ilanngullugu naliliisoqaqqinneratigut imaluunniit misilitsiqqinnikkut karakterit appasinnerusut anguneqarsinnaanerannik.

**§ 106.** Maalaartoq piumasaqarnermigut suliaassiisutaasimasup assilinnerqarneranik tunineqassaaq, aammalu allattariarsornikkut misilitsissutaasut imaluunniit suliniutitut misilitsissutaasuni allaganngorlugu akissutigisimasami assilinnerqarneranik tunineqassalluni.

**§ 107.** Maalaarneq misilitsinnermi suliaassiisummut, misilitsinnerup ingerlasimaneranut imaluunniit naliliiffigineqarnermut tunngasuusinnaavoq.

**§ 108.** Naammagittaalliuutip suliarinnerqarnerani ilinniarnertuunngorniarfup pissutsit atuuttut eqqarsaatigalugit sapinngisamik sivikinnerpaamik piffissaliilluni misilitsinnermi naliliisut maalaarummut tunngatillugu naliliinerat pissarsiarissavaa, ilinniarnertuunngorniarfullu maalaartoq naliliisuusimasut maalaarummut naliliinerannut oqaaseqarnissaanut periarfississavaa. Naammagittaalliortumut piffissaliusaaq nalinginnaasumik sapaatip akunneranik sivilissuseqartarpoq.

*Imm. 2.* Rektorip tamatuma kingorna ingerlaannaq maalaarut suliallu katersorneqarnera, tamatumunga ilanngullugu nammineq suliami ilinniarnertuunngorniarfup naliliinera Ilinniartitaanermut Naalakkersuisumut ingerlatissavaa. Rektorip nassuiaataa imaqarsinnaavoq suliap qanoq aalajangiiffigineqarnissaa pillugu inassuteqaammik.

**§ 109.** Naammagittaalliuutip aalajangiiffigineqarnera kinguneqarsinnaavoq naammagittaalliortup naliliiffigineqarqinnissamik neqeroorfigineqarneranik, imaluunniit naammagittaalliortup

naammagittaalliumminik ilalerneqannginneranik.

*Imm. 2.* Aalajangiineq naliliiffigineqagqinnissamik misilitseqqinnissamilluunniit kinguneqarsimappat ilinniartup aalajangiineq allaganngorlugu sapaatip akunnerisa marluk qaangiutinnginneranni akuerissavaa.

*Imm. 3.* Rektoril naliisuusullu aalajangiineq pillugu ilisimatinneqassapput.

**§ 110.** Nalileeqqinnissamik imaluunniit misilitseqqinnissamik aalajangiisoqarsimappat, rektorip sapinngisamik piaarnerpaamik nalileeqqittoqarnissaa imaluunniit misilitseqqittoqarnissaa aaqqissuutissavaa, naliliisussanillu nutaanik toqqaasoqassalluni.

*Imm. 2.* Misilitseqqinneq napparsimaneq pissutigalugu soraarummeernermut atatillugu ingerlanneqarsinnaavoq, taannalu piffissami soraarummeersitsiffiusumi pisinnaalluni.

*Imm. 3.* Naliliisussat nutaat suliamut maalaarutaasimasut tunngasunik ilisimatinneqassapput, nutaamillu naliliineq tunngavilersorneqassalluni.

*Imm. 4.* Nutaamik naliliinermi karakterit naliliinerusimasumut taartaassapput.

*Imm. 5.* Maalaaruteqartoq, rektoril aammalu naliliisuusimasut siulliit nutaamik naliliineq tunngavilersuutaasullu pillugit ilisimatinneqassapput.

#### *Pissutsit allat pillugit*

**§ 111.** Ilinniartuq tunngavilersukkamik nammineerlunilu ilinniarnertuunngorniariup nalunaarut manna tunngavigalugu aalajangiinerisimasai pillugit maalaarummik tunniussaqaarsinnaavoq. Ilinniartuq angajoqqaatut oqartussaassuseqartunit oqartussaaffigineqarpat, angajoqqaatut oqartussaassuseqartut naammagittaalliuuteqarsinnaapput.

*Imm. 2.* Naammagittaalliuut ilinniartitaanermut Naalakkersuisoqarfimmut allagartalligaassaaq ilinniarnertuunngorniariup tunniunneqassalluni.

*Imm. 3.* Naammagittaalliuut kingusinnerpaamik maalaartup pissutsit pineqartut pillugit ilisimatinneqarneraniit sapaatip akunnerisa marluk qaangiutinnginneranni tunniunneqarsimassaaq.

*Imm. 4.* Ilinniarnertuunngorniariup naammagittaalliortoq maalaarsinnaanermut siunnersussavaa.

**§ 112.** Ilinniartunik ilinniarnertuunngorniarnermiit anisitsinerit eqqaassanngikkaanni naammagittaalliuutit kingumoorumik atortussaassanngillat, ilinniartitaanermut Naalakkersuisoqarfik tamatumunnga tunngatillugu aalajangiinngippat.

**§ 113.** Rektorip naammagittaalliuut suliallu katersorneqarnera tamatumunnga ilanngullugu nammineq suliami ilinniarnertuunngorniariup nassuiaataa ilinniartitaanermut Naalakkersuisumut ingerlatissavaa. Nassiussineq sapinngisamik piaarnerpaamik isumagineqassaaq, kingusinnerpaamillu suliat tiguneqarneraniit sapaatip akunnera qaangiutsinnagu.

*Imm. 2.* Ilinniarnertuunngorniariup nassuiaataa suliap qanoq aalajangiiffigineqarnissaanut inassuteqaammik imaqaassaaq.

*Imm. 3.* Ilinniarnertuunngorniariup nassuiaasaa ilinniartitsisunit allanilluunniit naliliinernik ilaqassappat, taava illuatungeriit akornanni tusarniaanertut aaqqissuussamik ingerlatsisoqassaaq, naammagittaalliortorlu nalinginnaasumik sapaatip akunneranik piffissaqartinneqarluni naliliinernut pissarsiarineqarsimasunut oqaaseqarsinnaatinneqassaaq.

**Kapitali 8**  
*Atortuulersitsineq*

**§ 114.** Nalunaarut 1. august 2022 atortuulissaaq aammalu atortuussalluni Kalaallit Nunaanni ilinniarnertuunngorniarluni ilinniartitaanerni ilinniartunut ilinniarnertuunngorniarlutik 1. august 2012-ip kingorna ilinniarnerminnik aallartitsisimasunut.

*Imm. 2.* Peqatigisaanik Ilinniarnertuunngorniarluni ilinniakkami naliliisarneq aamma uppersaasiisarneq pillugit Namminersorlutik Oqartussat nalunaarutaat nr. 1, 23. januar 2015-meersooq atorunnaarsinneqarpoq.

*Namminersorlutik Oqartussat, ulloq 5. juli 2022*

Peter Olsen

Ilinniartitaanermut, Kultureqarnermut, Timersornermut Ilageeqarnermullu Naalakkersuisoq

/ Karsten Peter Jensen

**Namminersorlutik Oqartussat**  
Imaneq 4  
3900 Nuuk  
E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut

